

I. DISPOSICIÓNS XERAIS

CONSELLERÍA DE ECONOMÍA E FACENDA

Decreto 173/2007, do 30 de agosto, polo que se establece a forma de designación dos membros que integran o Consello Galego de Estatística.

A Lei 16/2006, do 27 de decembro, do Plan galego de estatística 2007-2011, que modifica a Lei 9/1988, do 19 de xullo, de estatística de Galicia, introduce cambios na composición do Consello Galego de Estatística previsto nos artigos 45 e seguintes desta última. Como consecuencia desta modificación cómpre determinar a nova forma de designación dos seus membros.

Na súa virtude, por proposta do conselleiro de Economía e Facenda, e en uso das atribucións que me confire a Lei 1/1983, do 22 de febreiro, reguladora da Xunta e do seu presidente, de conformidade co ditame do Consello Consultivo e logo de deliberación no Consello da Xunta de Galicia na súa reunión do día trinta de agosto de dous mil sete,

DISPOÑO:

Artigo 1º.-Composición.

O Consello Galego de Estatística estará composto polos seguintes membros:

1. A presidenta ou presidente, que será a conselleira ou conselleiro de Economía e Facenda.

2. A vicepresidenta ou vicepresidente, que será a directora ou director do Instituto Galego de Estatística.

3. As vogalías, coa seguinte distribución:

a) Unha persoa representante por cada un dos departamentos da Xunta de Galicia (Presidencia, Vicepresidencia, consellerías), con rango de secretario ou director xeral, designada polo órgano de que dependa.

b) Dúas persoas en representación do Consello das Cámaras de Comercio Galegas, designadas polo dito órgano.

c) Dúas persoas en representación da asociación empresarial intersectorial máis representativa da Comunidade Autónoma de Galicia.

d) Unha persoa representante designada por cada unha das organizacións sindicais máis representativas da Comunidade Autónoma de Galicia.

Para determinar as organizacións sindicais máis representativas da Comunidade Autónoma aplicarase o disposto no artigo 7.1º da Lei orgánica 11/1985, do 2 de agosto, de liberdade sindical.

e) Tres persoas en representación das organizacións profesionais de agricultores da Comunidade Autónoma de Galicia, designadas polo Consello Agrario Galego.

f) Dúas persoas en representación das organizacións de mariñeiros, designadas pola Federación Galega de Confrarías.

g) Dúas persoas en representación das organizacións de consumidores e usuarios, designadas polo Consello Galego de Consumidores e Usuarios.

h) Dúas persoas en representación da Administración local, designadas pola Federación Galega de Municipios e Provincias.

i) Unha persoa representante por cada unha das universidades de Galicia, designada polo respectivo reitor.

j) Tres persoas de relevancia profesional no campo da estatística, designadas polo conselleiro ou conselleira de Economía e Facenda.

k) Os titulares das subdireccións e da secretaría técnica do Instituto Galego de Estatística, de acordo coa súa estrutura orgánica, con voz e sen voto.

4. O secretario ou secretaria do consello, que será un funcionario ou funcionaria do Instituto Galego de Estatística, nomeado por resolución da súa dirección, con voz e sen voto.

5. Procurarase neste órgano a composición de xénero equilibrada, segundo o previsto na Lei 7/2004, para a igualdade de mulleres e homes, e na Lei orgánica 3/2007, do 22 de marzo, para a igualdade efectiva de mulleres e homes.

Artigo 2º.-Duración do mandato.

1. O mandato dos membros do Consello Galego de Estatística será de catro anos. Non obstante, aqueles membros que o sexan por razón do cargo ou en virtude de representación, perderán a condición de tales no momento de cesaren no devandito cargo, ou como representantes do colectivo que os designou.

2. No caso de producirse algunha vacante no Consello Galego de Estatística, esta deberá cubrirse de acordo co previsto no artigo anterior. O novo membro será polo tempo que falte para completar o mandato.

3. Sen prexuízo do disposto anteriormente, os representantes das universidades e das distintas organizacións deberán ser ratificados ou substituídos polas instancias que os designen, no caso de realización de eleccións para os seus órganos reitores. Igual exixencia deberá cumprirse para os representantes da Administración local, cando teñan lugar eleccións locais.

Disposición derogatoria

Queda derogado o Decreto 52/1995, do 16 de febreiro, polo que se establece a forma de designa-

ción dos membros que integran o Consello Galego de Estatística.

Disposicións derradeiras

Primeira. Facúltase o titular da Consellería de Economía e Facenda para ditar cantas disposicións sexan necesarias para o desenvolvemento e execución do disposto neste decreto.

Segunda. Este decreto entrará en vigor o día da súa publicación no *Diario Oficial de Galicia*.

Santiago de Compostela, trinta de agosto de dous mil sete.

Emilio Pérez Touriño
Presidente

José Ramón Fernández Antonio
Conselleiro de Economía e Facenda

Decreto 174/2007, do 6 de setembro, polo que se modifica o Decreto 133/2002, do 11 de abril, polo que se regula a concesión de préstamos polo Instituto Galego de Promoción Económica.

Mediante o Decreto 133/2002, do 11 de abril (DOG nº 78, do 23 de abril), polo que se regula a concesión de préstamos polo Instituto Galego de Promoción Económica, habilitouse o Igape para conceder préstamos ou créditos a favor de empresas domiciliadas en Galicia, nos ámbitos concretos de apoio aos emprendedores e de apoio ao financiamento de producións audiovisuais, establecendo así mesmo que calquer outro tipo de operación debería ser expresamente autorizada mediante decreto do Consello da Xunta de Galicia.

Posteriormente, mediante o Decreto 154/2004, do 7 de xullo (DOG nº 135, do 14 de xullo), habilitouse o instituto para conceder préstamos ou créditos destinados a financiar o desenvolvemento e/ou a implantación en Galicia de proxectos empresariais en materia de innovación tecnolóxica.

Vista a aceptación polas empresas destas liñas de apoio e tendo en conta a actual tendencia nas liñas de apoio públicas e nas directrices da Unión Europea á utilización de instrumentos e programas de axuda reintegrables, enténdese oportuno modificar a normativa para ampliar as finalidades dos préstamos do Igape co fin de dotalos dun maior ámbito.

Así mesmo, enténdese oportuno modificar o artigo cuarto do Decreto 133/2002, do 11 de abril, no referente aos créditos habilitados para estes programas co fin de acadar unha maior axilidade na operativa contable do instituto.

Na súa virtude, por proposta do conselleiro de Economía e Facenda, e logo de deliberación do Consello

da Xunta de Galicia na súa reunión do día seis de setembro de dous mil sete,

DISPOÑO:

Artigo único.-Os seguintes artigos do Decreto 133/2002, do 11 de abril, polo que se regula a concesión de préstamos polo Instituto Galego de Promoción Económica (DOG nº 78, do 23 de abril) pasan a ter a seguinte redacción:

«Artigo 2º

O Igape poderá conceder préstamos ou créditos de acordo cos requisitos e características establecidos nos programas que con carácter xeral para tal efecto aprobe e que, polo menos, establecerán os requisitos dos posibles prestameiros, destino dos fondos, prazo e condicións das operacións e que serán obxecto de publicación no *Diario Oficial de Galicia*.

Calquer outro tipo de operación deberá ser expresamente autorizada mediante acordo do Consello da Xunta de Galicia.

De conformidade co disposto no artigo 14.2º da Lei orgánica 3/2007, do 22 de marzo, para a igualdade efectiva de mulleres e homes, que establece como criterio xeral de actuación dos poderes públicos, entre outros, o de potenciar o crecemento do empresariado feminino, por acordo do Consello da Xunta de Galicia poderanse establecer os ámbitos en que, por razón da existencia dunha situación de desigualdade de oportunidades entre mulleres e homes, os devanditos programas e operacións poderán incluír, de ser o caso, a valoración de actuacións de efectiva consecución da igualdade por parte das entidades solicitantes, tendo en conta o previsto no artigo 35 da Lei 3/2007 e, de ser o caso, no artigo 19 e concordantes da Lei 2/2007, do 28 de marzo, do traballo en igualdade das mulleres de Galicia.

Artigo 4º

A concesión de préstamos ou créditos polo Igape farase dentro das disponibilidades financeiras que para este fin se establezan a partir das dotacións orzamentarias do instituto, incrementadas, de ser o caso polos importes que se deriven dos convenios ou concertos que para tal efecto o Igape subscriba con entidades públicas ou privadas. Anualmente publicaranse no *Diario Oficial de Galicia*, mediante resolución da persoa titular da dirección xeral do Igape, logo do acordo do Consello de Dirección, as partidas orzamentarias e os importes reservados para a concesión de préstamos».

Disposicións derradeiras

Primeira.-A persoa titular da Consellería de Economía e Facenda poderá ditar as normas necesarias para a aplicación do que neste decreto se dispón.